

ጾዎሎሴ ማደም ዳኪንቴ ጳውሎሴ ኪኢቶ ቴቶም ዓይያ ካር

ቴቶ ዓይሁዴ ማዕባኣ ዓሲታ። ኪሪሰቶሴ ጉሙርቂ ላኣሚንቴ ዓሲ ማዕዛ። ጳውሎሴና ዋላ ኮዠ ሃይሶ ኬኤዚያ ማደ ዒዛኮ ዴማ ማዕ ማደያኬ፤ ጳውሎሴ ሃያ ኪኢቶ ፃኣፕሢ ጴጌ ናይታ። ዒዛና ዋላ ማደ ቴቶም ማዕዛ ቴቶ ዬኖ ዋዶና ቁርፃሴይዳ ዓኣ ሺኢጲያ ማኣር ማደ ሃንቲ ሃንቲ ዛጋያኬ። ሃና ኪኢታ ሃይሃ ዴኤፕ ዴኤፕ ማሊሢ ዓርቁያኬ።

ፔታሳ።- ቁርፃሴ ሺኢጲያ ማኣር ዓሶ ዋይሃ ዓሶኮ ማሊያ ዋማዒ ማዕንዳያ ኮይሳቴያ ባሼ ዒኢካ ዓኣ ዓሶኮ ፑርቶ ማሊያ። ዒቁያና ዋይሃ ዓሳ ዋማዒ ማዕንዳያ ኮይሳቴያ ቴቶም ላቲ ኬኤዚንቴ፤ ላምዓሳ።- ሺኢጲያ ማኣርይዳ ዓኣ ዴማ ዴማ ዓሶ ጌይፃ ዓቲንቆ ጋርቾ። ላኣሎ ጋርቾ። ዴጌ ዓቲንቆንታ ዓሶም ማደ ዓሶንታ ዋማይዒ ዒ ዒርዛንዳቴያ ቴቶም ዘርናያኬ፤ ጋፒንያይዳ ኪሪሰቶሴ ጉሙርቃ ዓሶኮ ዓኣያ ማዕኒ ኮይሳ ማሊሢ ኬኤዛኬ፤ ዬይያ።- ዓሲና ኮሸኪ ዒጊንቴ ናንጎንዶ ጎይሢና ሺኢጲያ ማኣር ዓሶ ባኣካ ዋሊ ዒፃሢንታ ማርሞንታ ዴማዲሢንታ ባኣያ ማዕ ናንጋንዳጉዲ ዓሶ ዘርሞ ጌይ ቴቶ ዓይሣያኬ።

ማፃኣፔላ ዴማ ዴማ ዓርቁ ባኮ

ዓይያ ካር (1:1-4)

ሺኢጲያ ማኣር ዋይሃ ዓሶ ዛላ ኬኤዚንቴ ባኣዚ (1:5-16)

ሺኢጲያ ማኣርይዳ ዓኣ ዴማ ዴማ ዓሶ ዛሎ ኬኤዚንቴ ባኣዚ (2:1-15)

ጳውሎሴ ዘሬ ዘርና ላቲ ኬኤዜ ባኮ (3:1-11)

ጋፒንሢ ሃይሴ (3:12-15)

1 ጾኦሲም ማደያ ሃሃ ዬሱሰ ኪሪሰቶሴ ማደም ዳኪንቴያ ማዕ። ጾኦሲኮ ዶኦሪንቴዘንሢ ጾኦሲ ጉሙርቁያ ዛሎ ኬኤዚ ማኣዳኒና ጾኦሲ ካኣኸኮ ጎኡሞ ዒርዛኒ ዶኦሪንቴ ጳውሎሴይዳ።-

2 ዒያቶኮ ናንጊና ናንጊኮ ሃጊ ማዕንዳ ዋዛ ዓኣያ ማዕንዳ፤ ጾኦሲ ማርጌ ዋይኮ ቤርታ ዒንጋኒ ጫኣቁ ናንጊና ናንጎ ዒያታ ዴንቃንዳ። ጾኦሲ ፔቴታ። ሉኡቁሞሴ። 3 ዬና ዋዳ ሄላዛ ጾኦሲ

ዬያ ፔ ቃኦሎና ፔጋሲ ዳዌኔ፤ ዬይ ቃኦላ ታ ማዳንዳጉዲ ታኦም ቢንገንቴሢር ኑና ዳቂሻ ጾኦዛሢ ዓይሢያ ጎይያ ታ ኬኤዛኔ።

4 ኑኡኒ ቢያሢ ጉሙርቃ፣ ጾኦሲ ጉሙርቂያ ዛሎና ታኦኮ ጎኔ ናዓሢ ማዕፍ፣ ጥቶም፤

ጾኦሲ፣ ዓዳሢና ኑና ዳቂሻ ዬሱሰ ኪሪሰቶሴናይዳፓ ማዕ ኮሹሞ ቢንገያና ዎዛና ኔኤም ማጾንጎ።

ጥቶ ቄርጻሴይዳ ማዳንዳጉዲ ዓይሢንቴ ባኮ

5 ታ ኔና ቄርጻሴይዳ ሃሼሢ ቢኦካ ፓጩ ባኮ ኩንሣንዳጉዲና ኔ ማዳንዳጉዲ ታ ኔኤም ዓይሢ ጎይያና ሺኢጲያ ማኦር ጨሞ ካታሞይዳ ካታሞይዳ ኔ ዶኦራንዳጉዲ ጌዒኔ። 6 ሺኢጲያ ማኦር ጨሞ፡- ዶንኪንቴሞና ፔቴ ላኦሊ ዔኬያ፣ ዓይሢንቴሞ ማዓሢና ገንሣ ሃሣ ማቸ ማዓባኦና ላሂ ላሂ ፔ ሱንጾ ፑርቴሱሞ፤ ዬያጉዲ ሃሣ ናኦታ ዒዛኮ ኪሪሰቶሴ ጉሙርቃ ማዓኒ ኮይሳኔ። 7 ሺኢጲያ ማኦር ዎይሣ ዓሳ፡- ጾኦሲ ማዳ ማዳንዳጉዲ ጉሙርቂ ቢንጎና ዓሲ ማዓሢር ዶንኪንቴሞ ዓሲ ማዓኒ ኮይሳኔ፤ ጌይያ፡- ሄርሺንቴሞ፣ ዑኩና ዳጋዲሞ፣ ዑሸኪ ማሢንቴሞ፣ ዓሲና ዣሎሞ፣ ዔርቴሞ ጎይሢና ፔና ማኦዳንዳ ባኦዚ ዔካኒ ኮውሞ፤ ጌይያ፡- ሚኢሼር ጎይቂሞ ማዓኒ ኮይሳኔ። 8 ዬያይዳፓ ሸኦቹ ዔካያ፣ ኮሺ ማዕ ባኦዚ ናሸካያ፣ ፔና ዔሪ ዎይሣ፣ ፒዜ ዓሲ፣ ዒናና ዓኦ ዓሲ ሃሣ ኮይሳ ጎይሢ ናንጋያ ማጾንጎ። 9 ዒ ዔሪ ጎይያጉዲና ጉሙርቂንታያ ማዕ ኪኦቶ ኮሺ ዓርቃ ማዓኒ ኮይሳኔ፤ ዬያይዲያና ሜሌ ዓሶ ዘራኒና ዬያ ዒፃ ማካ ዓሶሞ ጎራኒ ዒ ዳንዳዒ።

10 ዓይጎር ጌዔቴ ዓይሁዶ ፃጳፓ ማዕያ፣ ዓይሢንቴሞ፤ ሃሣ ጉሪ ጌሰቴ ጌሰቴ ሺራ ጌሻ ሚርጌ ዓሲ ዓኦሢርኬ። 11 ዬያ ዓሶ ዘቴዳኒ ኮይሳኔ፤ ዓይጎር ጌዔቴ ዔያታ ፒዜ ማዓባኦ ጎይሢና ሚኢሼር ጎይቂ ጎይቂ ዔርዛኒ ኮይሱሞ ባኦዚ ዔርዚ ዔርዚ ፔቴ ማኦር ዓሶ ካራና ፑርቴሳኔ። 12 ዔያቶኮ ዣይሰኬይ ዔያቶ ዛሎ ኬኤዛያ፡- «ቄርጻሴ ዓሳ ቢያ ዎዳ ሉኡቃያ፣ ፑርታ ቦያ ማዕያ፣ ሃሣ ቤልፃዳና ሙኡዚ ዓሲኬ» ጌዔኔ። 13 ዬያ ዓሢኮ ማርካታ ጎኔኬ፤ ዬያር ፒዜ ዔያታ ጾኦሲ ጉሙርቃ ማዓንዳጉዲ፣ 14 ዓይሁዶ ዓሶኮ ኬኤዚ ሺር ሃይሶ ዔያታ ዔኩሞጉዲና ጎኦሞ ዒፃ ዓሶ ዘር ዔያታ ዎይዙሞጉዲ ኮሺ ዔያቶ ጎራ። 15 ዒሩ ጌኤዙ ዓሶም ቢያ ባኦዚ ጌኤሺኬ፤ ዒሩ ፑርቶ ዓሶና ጾኦሲ ጉሙርቂሞ ዓሶም ጋዓንቴ ጌኤሺ ማዕ ባኦዚ ባኦሴ፤ ጉቤ ዔያቶኮ ዒናና ማሊያና ፑርቴያኬ።

1:4 1:4 2ቆሮ. 8:23፤ ገላ. 2:3፤ 2ፃሞ. 4:10። 1:9 1:9 1ፃሞ. 3:2-7።

16 ዔያታ፡- «ኮኡኒ ጾኦሲ ዔራኔ» ጋዓኔ፤ ዔያታ ማዳ ማዳና ጋዓንቴ፡- «ጾኦሲ ኑ ዔራቀሴ» ጋዓ ዓሲ ማዓኔ፤ ዋይቲ ጌዔቴ ዔያታ ዒሣ ዓሲ፡ ዓይሣንቴዋ ዓሲ፤ ሃሣ ፔቴታዎ ኮሺ ማዳ ማዳኒ ዳንዳዑዋያ ማዔሣረኬ።

2

ፒዜ ማዔ ዔርዚሣ

1 ኔኤኒ ጋዓንቴ ፒዜ ማዔ ዔርዚጾና ዋላ ገኢጋያ ማዔ ባኣዚ ዔርዜ፤ 2 ዓቲንቆ ጋርቻ፡- ኮይሳ ጎይጾ ናንጋያ፡ ፔ ቦንቾ ካፓያ፡ ዔኤቢ ዔሪ ማዳያ፡ ጾኦሲ ጉሙርቁሣና ናሹዋዋ ዓኣያ ሃሣ ገቢ ዳንዳዒሣና ኦ ደዲ ዓሲ ማዓንዳጉዲ ዔያቶ ዘሬ። 3 ዬያጉዲ ሃሣ ላኣሎ ጋርቻ፡- ኮይሳ ጎይጾ ናንጋያ፡ ቦንቾ ፔኤሲ ካፓያ፡ ዓሲ ደንኩዋያ ሃሣ ዑሺ ናሽካያ ማዑዋጉዲ ዔያቶ ዘሬ፤ ዬያይዳፓ ዔያታ ኮሺ ማዔ ባኣዚ ሜሌ ዓሶ ዔዔርዚያ ማዎንጎ፤ ዬይያ፡ 4 ሎዔ ዴጌ ላኣላ ፔኤኮ ዓኒንሣና ናኣቶና ናሽካንዳጉዲ፡ 5 ዔኤቢ ዔሪ ማዳያና ዒኔ ጌኤሺ፡ ማኣሪ ማዳ ማዳያ፡ ኮሺ ማዔያ፡ ፔኤኮ ዓኒንሣም ዓይሣንታያ ማዓንዳጉዲ ዔያታ ዔርዘንጎ፤ ዴጌ ላኣላ ያዲዴቴ ጾኦሲ ቃኣሎ ቦሃንዳ ዓሲ ባኣሴ።

6 ዬያጉዲ ላኣሎ ዔኬ ዓቲንቆ ዴጌሣ ፔና ዔሪ ዋይሣንዳጉዲ ዔያቶ ዘሬ፤ 7 ኔኤኒ ቢያ ባኣዚና ኮሺ ባኣዚ ማዲ ማዲ ዔያቶም ኮኣከንሣ ማዔ፤ ኔ ዔያቶ ዔርዘ ዋደና ኮይሳ ጎይሣና ናንገሣ፡ ጎኔ ሃይሴ ጌሰቲሣ፤ 8 ደንከንቴዋ ኮሺ ጌኤሲ ዔያቶም ዳዌ፤ ዬያይዲጾና ኦና ዒዲ ማካ ዓሳ ኦጊዳ ጌሰቶንደ ፑርታ ባኣዚ ዴንቁባኣ ዋደና ቦርሲንታንዳኔ።

9 ማዳ ዓሳ ማዲሻ ዓሶም ዓይሣንታንዳጉዲ፡ ቢያ ባኣዚና ዔያቶ ዋዘሳንዳጉዲ ሃሣ ፑርታ ዑኡሲያ ዔያቶም ማሁዋጉዲ፤ 10 ዋይሣ ዓሶኮ ዓኣ ባኮዋ ዉኡቁዋጉዲ ዘሬ፤ ኦና ዳቁሻ ጾኣዛሣኮ ዔርዚጾ ቢያ ባኣዚና ቦንቾንታንዳጉዲ ቢያ ዋዴ ጉቤ ዒናፓ ጉሙርቁንታያ ዔያታ ማዎንጎ።

11 ጾኦሲ ዓሲ ቢያ ዳቁሻ፡ ኮሹዋ ዒንገሣ ፔጋሲ ዳዌኔ፤ 12 ዬይ ኮሹዋ ዒንገጻ ጎሜ ዓሲ ማዒሣና ዓሲ ማላሣ ሱኡኬ ኑ ሃሻንዳጉዲና ኦና ኑ ዔሪ ዋይሥሣና፡ ሃሣ ዲሉዋና ገንሣ ዓያናና ዓኣ ዓሲያ ማዒ ሃያ ሳዎይዳ ኑ ናንጋንዳጉዲ ኦና ዔርዘኔ። 13 ዬያይዲ ኑ ዓንጂንቴ ኦኡኮ ሃጊ ማዓንዳ ዋዘ ካፓኔ፤ ዬይ ኦኡኒ ካፓ ሃጊ ማዓንዳ ዋዘ፡ ዴኤፖ ኦኡኮ ጎዳሣ፡ ኦና ዳቁሻ ዬሱሰ ከሪሰቶሴኮ ቦንቾና ሙኪ ዴዲጾኬ። 14 ከሪሰቶሴ ፑርታ ባኣዚ ቢያይዳፓ ኦና

ዳቂሻጊና ኮሺ ማዶ ማዳኒ ጎኑባ ማዕያ ሃሣ ዒዛም ኑ ዲማዴያ ጌኤሺ ዓሲ ማዕንዳጉዲ ኑና ጌኤሻኒ ኑ ጋይቲ ፔና ዓኣሢ ዒንጌኔ።

15 ዓካሪ ሃንሢ ባኮ ዔርዜ፤ ጉቤ ማዕ ቢታንቶና ዓሶ ዘሬ፣ ሃሣ ጎሬ፤ ያኣኒያ ኔና ቦሆፓ።

3

ኪሪሰቶሴ ጉሙርቃ ዓሲ ማዳንዳ ማዶ

1 ዓሳ ቢያ ዋይሣ ዓሶና ቢታንታ ዓኣ ዓሶናም ሹሌዑሞና ዓይሢንታንዳጉዲ ሃሣ ኮሺ ማዶ ቢያ ማዳኒ ጊኢጌያ ማዕንዳጉዲ፣ 2 ያ ዑሢዳኣ ፑርታ ባኣዚ ጌሰቱሞጉዲ ዔያቶም ላቲ ኬኤዜ፤ ዬያይዳፓ ዓሲና ዋላ ፑርቱሞና፣ ኮሺ ዓሲ ሃሣ ጎኔ ዒናፓ ዓሲ ቢያም ሹሌዓያ ማዶንጎ፤ 3 ኑኡኒ ሃያኮ ቤርታ ማለሢባኣያ፣ ዔኤያ፣ ዓይሢንቲ ዒፃያ፣ ዳቢንቲ ጌሺንታያ፣ ዲማ ዲማ ፑርቶ ኑ ማሊያ ሱኡኮ ኩንሣያ፣ ጌኔ ማዶ ማዳያ ሃሣ ቂኢራያ፣ ዑራዲያና ዋሊ ሴካና ሃንጋና ዒፃያ ማዒ ኑ ናንጋያኬ። 4 ጋዓንቲ ኑና ዳቂሻ ያኣዛሢኮ ኮሹሞና ናሹሞና ፔጋዴ ዋዶና፣ 5 ኑ ማዴ ዒሉሞ ማዶናቱሞንቲ ፔኤኮ ማኣሪያና ኑና ዒ ዳቂሹኔ፤ ኑና ዒ ዳቂሹሢያ ላሚ ሸይንቲሢ ማዕ ማሰቲሢና ዓያኖ ጌኤዡ ዘሎና ጴዴ ላኣሚንቲናኬ። 6 ያኣሲ ኑና ዳቂሻ፣ ዬሱሰ ኪሪሰቶሴ ዘሎና ፔኤኮ ዓያኖ ሚርጌና ኑም ኬይሴኔ። 7 ዬያ ዒ ማዴሢ ዒዛኮ ኮሹሞ ዒንጌያና ኑ ዒሊ፣ ሃጊ ማዕንዳ ዋዛ ማሢ ኑ ካፓ ናንጊና ናንጎሞ ኑ ዴንቃንዳጉዲኬ። 8 ሃይ ታ ኔኤም ኬኤዜ ባካ ቢያ ጎኔ ባኣዚኬ።

ያኣሲ ጉሙርቃ ዓሳ ቢያ ኮሺ ማዶ ዶዲ ማዳንዳጉዲ፣ ሃያ ታ ኔኤም ኬኤዜ ባኮ ቢያ ዶዲሺ ዔያቶም ኔ ኬኤዛንዳጉዲ ታ ኮዓኔ፤ ዬይ ባካ ኮሺ ማዕያ፣ ሃሣ ዓሲም ኮይሳ ባኣዚኬ። 9 ጋዓንቲ ፓሠሞ ማርሞይዳፓ፣ ዓሲኮ ዜርሢ ፓይዲ ሺሪያይዳፓ ሃሣ ዓሲና ዣለሢና ሙሴ ዔርዜ ሞጎ ዘሎ ዔቃ ጎሪንቲዳፓ ሃኬ፤ ዓይጎር ጌዔቲ ዬይ ባካ ፓሢ ባኣዚ ባኣያና ጉሪ ማዕ ባኣዚታሢርኬ። 10 ሺኢጲያ ማኣር ዓሶ ዋሊፓ ዲማሳ ዓሲ ፔቲና ዘሬ፤ ዬካፓ ሃሣ ላሚ ላቲ ዒዛም ኬኤዜ፤ ያፓ ዑሣ ዓኣዴቲ ጋዓንቲ ዒዛና ዋላ ፔቲ ማዒፓ። 11 ዬያጉዴ ዓሲ ዣኣሌ ዓሲኬ፤ ዒ ጎሚ ማዳሢር ፔ ዑፃ ሜቶ ዓከ ዬዓያ ማዕሢ ዔሬ።

ጋፒንሢ ዘር

2:14 2:14 ዓይኑ. 130:8፤ ኬሲ. ማፃ 19:5፤ ላሚ. ሞማ 4:20፤ 7:6፤ 14:2፤ 1ጴ፪. 2:9።

12 ዓርጊማሴ ሃንጎ ቲኪቆሴ ኔ ኮይላ ታ ዳካዛ ኔኤኒ ታ ዓኣ ቤዘ፣ ኒቆጲሊዮኔ ዑኩና ሙኩኔ፤ ዓይጎሮ ጌዔቲ ባርጎ ታኣኒ ዒዞ ቤዘይዳ ዴዒ ዓኣሣኒ ማሌሣሮኩ። 13 ዋጎ ኮሺ ዔራ ዜማሴና ዓጲሎሴ ጎዖሣናም ኮይሳ ባኮ ቢያ ዒንጊ ጎይፆ ዔያታ ዓኣዳንዳጉዲ ማኣዴ።

14 ኑ ዓሶ ማዔ ዓሳ ማኣዳ ባኣዚ ባኣያ ማዒ ዓቱዋጉዲና ፔኤኮ ናንጎ ዔያታ ፔኤሮ ዳንዳዓንዳጉዲ ኮሺ ማዶ ማዲሣ ዔሮንጎ።

15 ታኣና ዋላ ዓኣ ዓሳ ቢያ «ኮሺዳ?» ኔና ጋዓኔ፤ ፆኦሲ ጉሙርቃ ዓሶ ዛሎና ኑና ናሽካ ዓሶም ቢያ «ዒንሣ ኮሺዳ?» ጌዔኔ፣ ጌዔ። ፆኦሲኮ ኮሹሞ ዒንጊፆ ዒንሣና ቢያ ማዖንጎ።

3:12 3:12 ዳኪ. ማዶ 20:4፤ ዓፕ. 6:21-22፤ ቆላ. 4:7-8፤ 2ፂሞ. 4:12። **3:13** 3:13 ዳኪ. ማዶ 18:24፤ 1ቆሮ. 16:12።

ጌሌዥ ማግኔግ
The Holy Bible in the Maale language of Ethiopia,
using Ethiopic script

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዥ ማግኔግ

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929